



## En memoria da

### Karl Josef Bartholdi, Rueras 1927 – 2005

bb-Tgi en Tujetsch ha buca empriu d'enconuscher il Karl Bartholdi el decuors dils davos onns. In umeneri, tgau alv, che saveva tier discours star sin siu meini e buca semuentar naven da quel. Aschia eis el vegnius enconuschents, ei separticipaus ell' uniun da tira-durs, segidava cun las uniuns da Rueras e pren-deva viv part dil far e demanar da nossa vischernaunca. Mo ils davos quater onns han ins viu el pli e pli pauc sin via ed igl ei vegniu quiet entuorn el.

Bein enqualin po ver emblidau ch'el era aunc adina in da nos vischins. Aschi spert sa ei ira e cura ch'il zenn da miert tucca tut surstat ins dalla tresta nova.

Karl Josef Bartolid ei naschius ils 4 d'uost 1927 sco burgheis da Oppikon, oz Busnang el cantun da Turgovia. El ei staus il tierz affon, dad 11 fargliuns, il frar vegl. Sper el ein siat soras carschidas si e treis frars. Sco ei era da quei temps ha el gudiu ina strengta affonza e tuttina in temps da giuventetgna cuntenta. Las scolas sco era igl emprendissadi da miradur ha el absolviu el cantun Turgovia. Suenter ha el giu la caschun da mussar sias habilitads tier la construcziun dalla piazza aviatica a Kloten.

Ils 20 da fevrer 1960 marida el dunna Anna Bannwarth. Els han survegniu la feglia Claudia ed il fegl Titus. In bab stregn eis el staus, denton gests. Sin las biaras e liungas spassegiadas ha el mussau pruamein a ses affons con biala la natira sa esser. Flurs, animals e vermaneglia tut era ad el enconuschent. Cun leger bia eis el adina sescolaus e sia savida era multifara e vasta. Era sin siu mistregn era el fetg capavels, ambizius e pretendeva il medem da ses affons.

Cuort suenter ver maridau ha el survegniu ina piazza tier il departament da construcziun aulta dil marcau da Winterthur. Cheu ha el luvrau tochen sia pensiun igl onn 1992. Il svilup da quei marcau turitges ha el adina perse-

quitau. Malgrad siu engaschi cumplein sil camp da laver eis el adina segidau e giu ureglas aviartas per cloms d'agid. Entras siu meinu nunballuccont pudevan ins bein ver il sentiment d'in um dir, mo egl intern haveva el adina in bien cor ed in maun aviert.

Muort la malsogna dalla asma ha el encuretg levgiament els cuolms, nua ch'el ei secasaus suenter la pensiun; numnadamein a Rueras. Sia dunna era gia morta ed il vitg e ses habitonts haveva el empriu d'enconuscher dis da vacanzas da pli baul. Nies cantun haveva el propi per cor. Ualti carteivel ha el visitau ni percurriu tuttas 150 vals da quel.

Sia admiraziun sudeva allas punts spectacularas, allas viasfier e las diversas vias.

Sil di da siu 70avel natalezi igl onn 1997 ha sia feglia Claudia organisau per la davosa gada ina s'entupada denter fargliuns, pertgei suenter esser serendius el Grischun eran ils contacts cun ses fargliuns ed affons vegni scarts. Dus accidents, in igl onn 2000 e l'auter strusch in onn suenter han tiers el diltuttafatg ord il canvau. Dimoras en spitals e clinicas havevan fatg vegnir el tut marvels e prest unfis da viver. «Mai pli da quei» scheva el.

Segir eis ei stau levgiament per el da saver astgar murir en sia atgna habita-ziun. Empau persuls, mo siu giavisch ei aschia tuttina serevelaus.

Patertgond vid ils discours e dispetas che jeu hael giu cun el, udend aunc adina sia vusch che saveva vegnir ferma, sia egliada franca e nunballuc-conta cura ch'ei mava per patria e Diu, mauncan tals discours a mi. Cudischaus sco el era, saveva el motivar francamein siu patertgar. Possi el ver anflau el parvis buns partenaris per ses discours e ver anflau il ruous ch'el ha giavischau ed era cartiu da puder contonscher.

Karl, rauassa en pasch.